



# პარტიის XX ყრილობის გადაწყვეტილებები კომუნისტური მშენებლობის საბრძოლო პროგრამა

**სოხუმი.** (საგ. კორ.). საქალაქო პარტიული ორგანიზაციის აქტივის კრებამ ნოისმინა საქართველოს კომპარტიის აფხაზეთის საოლქო კომიტეტის პირველი მდივნის ყრილობის დელეგატის ამხ. ო. გოცირიძის მოხსენება საბჭოთა კავშირის კომუნისტური პარტიის XX ყრილობის შედეგებისა და სოხუმის საქალაქო პარტიული ორგანიზაციის ამოცანების შესახებ.

მომხსენებელმა და კამათის მონაწილეებმა აღნიშნეს, რომ კომუნისტები, სოხუმის ყველა მშრომელი, ისევე როგორც მთელი საბჭოთა ხალხი, ერთსულოვნად იწონებენ XX ყრილობის ისტორიულ გადაწყვეტილებებს, რომლებშიც დასახულია ჩვენს ქვეყანაში კომუნისტური მშენებლობის საბრძოლო პროგრამა. სულ უფრო და უფრო ვითარდება მასების პოლიტიკური და შრომითი აქტივობა, ძლიერდება სოციალისტური შეჯიბრება მეექვსე ხუთწლედის პირველი წლის გეგმის მთლიანად და გადაჭარბებით შესრულებისათვის. ქალაქის ბევრი სამრეწველო საწარმო სამეურნეო წლის დასაწყისიდანვე წარმატებით ახორციელებს სოციალისტური შეჯიბრებით ნაკისრ ვალდებულებებს, ზრდის პროდუქციის გამოშვებას, აუმჯობესებს მის ხარისხს. მთლიანად სოხუმის მრეწველობამ მიმდინარე წლის განვლილ ორ თვეში საერთო პროდუქციის გამოშვების გეგმა გადაჭარბებით შეასრულა.

მიუხედავად ამ მიღწევებისა, როგორც აქტივის კრებაზე აღინიშნა, მრეწველობის მუშაობაში სერიოზული ნაკლოვანებებია. ზოგიერთ საწარმოში ჯერ კიდევ მოუწყობელია შრომა, სუსტად წარმოებს ბრძოლა ტექნიკური პროგრესისათვის, წარმოებაში მეცნიერების მიღწევების დანერგვისათვის, ამის გამო თევზის კომბინატი, ადგილობრივი მრეწველობის სამინისტროს და აფხაზეთის სარეწაო საბჭოს საწარმოები შეუწყნარებლად ჩამორჩებიან სახელმწიფო დავალებათა შესრულებაში. არადაამაკმაყოფილებლად მუშაობენ სამშენებლო ორგანიზაციები: „ზაქტრანსსტროის“ ტრესტის № 7 სამშენებლო უბანი, „აზჩორობსტროის“ სოხუმის სამშენებლო-სამონტაჟო სამმართველო და სხვები, რომლებიც არ ასრულებენ სამშენებლო-სამონტაჟო სამუშაოთა გეგმებს, ცუდად იყენებენ ტექნიკას.

ს. ორჯონიკიძის სახელობის ტყავფებსაცმლის კომბინატის დირექტორმა ამხ. ა. ღვინჯილიამ ილაპარაკა საწარმოში არსებულ ნაკლოვანებებზე. მან გააკრიტიკა საქართველოს სსრ მსუბუქი მრეწველობის სამინისტრო, რომელიც კომბინატს არ უწევს საჭირო დახმარებას. ორატორმა აღნიშნა, რომ სსრ კავშირის მსუბუქი მრეწველობის სამინისტროს თბილისის ტყავ-ნედლეულის ქარხანა (დირექტორი

რ. ნიკოლაიშვილი) კომბინატს დაბალხარისხოვან ნედლეულს აწვდის.

სოხუმის სამრეწველო კომბინატის დირექტორმა ამხ. შ. ჭანტურიამ განაცხადა, რომ კომბინატის მეტ წილ სამშრომელთა შორის არსებობს კუსტარულობა, ხელით შრომა, რაც დაბლა სწევს შრომის ნაყოფიერებას. ქალაქის სხვადასხვა ადგილას ერთი და იმავე პროფილის სამშრომელთა არსებობა ხელს უშლის ახალი ტექნიკის დანერგვას, ტექნიკური პროგრესისათვის ბრძოლისა და ტექნოლოგიის გაუმჯობესებას.

აქტივის კრებაზე სოციალისტურ შეჯიბრებაში ფორმალისმის მრავალი მაგალითი მოიყვანა რკინიგზის სოხუმის კვანძის პარტიული კომიტეტის მდივანმა ამხ. ი. ცომაიამ. მან გააკრიტიკა ტრესტი „ზაქტრანსსტროი“ და სხვა სამშენებლო ორგანიზაციები, რომლებიც მეტად აჭიანურებენ საბინაო-საყოფაცხოვრებო და საწარმოო ობიექტების მშენებლობას.

აფხაზეთის ასსრ დ. გულიას სახელობის ენის, ლიტერატურისა და ისტორიის ინსტიტუტის დირექტორის მოადგილემ სამეცნიერო ნაწილში ამხ. გ. ძიძარია დააყენა საკითხი რესპუბლიკის სასოფლო-სამეურნეო სამეცნიერო-საკვლევ დაწესებულებათა რეორგანიზაციის შესახებ.

პარტიის აფხაზეთის საოლქო კომიტეტის მდივანმა ამხ. ი. თარბამ, მაქსიმ გორკის სახელობის სახელმწიფო პედაგოგიური ინსტიტუტის დირექტორმა ამხ. ნ. ხურციძემ, სოხუმის ინდუსტრიული ტექნიკუმის დირექტორმა ამხ. ა. მიქაძემ ილაპარაკეს იდეოლოგიური მუშაობის სერიოზულ ნაკლოვანებებზე. სკოლებსა და სასწავლებლებში სასწავლო-აღმზრდელობითი მუშაობის დაბალი დონით აიხსნება, რომ ზოგიერთი მოსწავლე და სტუდენტი წესიერად არ იქცევა საზოგადოებრივ ადგილებში.

კამათში მონაწილეობა მიიღეს აგრეთვე პარტიის სოხუმის საქალაქო კომიტეტის პირველმა მდივანმა ამხ. შ. ჩიქოვანმა, კომკავშირის სოხუმის საქალაქო კომიტეტის მდივანმა ამხ. ვ. შირიაევამ, აფხაზეთის ასსრ განათლების მინისტრმა ამხ. ნ. გერიამ, კავშირგაბმულობის აფხაზეთის საოლქო კანტორის პარტიუროს მდივანმა ამხ. ე. რეზნიჩენკომ, გაზეთ „სოვეტსკაია აბხაზიას“ რედაქტორმა ამხ. გ. სემიონოვმა და სხვებმა.

აქტივის კრებამ ერთსულოვნად მოიწონა პარტიის XX ყრილობის გადაწყვეტილებანი და აღნიშნა, რომ ქალაქის პარტიული ორგანიზაციები, სოხუმის მშრომელები, რომლებიც მტკიცედ არიან დარაზმულნი მშობლიური კომუნისტური პარტიისა და მისი ლენინური ცენტრალური კომიტეტის გარშემო, მთელ თავიანთ ძალებს მოახმარებენ პარტიის XX ყრილობის მიერ დასახული ამოცანების წარმატებით განხორციელებას.